



Sumáriu Kazu
Tribunál Distritál Baucau
Abril 2016

A. Sumáriu prosesu julgamentu kazu iha Tribunál Distritál Baucau

1. Totál kazu ne'ebé JSMP monitoriza: 33

Tipu Kazu	Númeru
Artigu 145 Kódigu Penál (KP) & artigu 35 (b) Lei Kontra Violénsia Doméstika (LKVD) - Ofensa ba integridade fízika simples ho natureza violénsia doméstika	14
Artigu 145 (KP) - Ofensa ba integridade fízika simples	10
Artigu 258 (KP) - Danu simples	2
Artigu 145 no 157 (KP) - Ofensa ba integridade fízika simples no ameasa	1
Artigu 145 no 258 (KP) - Ofensa ba integridade fízika simples no danu simples	1
Artigu 157 no 258 (KP) - Ameasa ho danu simples	1
Artigu 154 (KP) - Maus tratus ba kónjuje	1
Artigu 140 (KP) - Omisídiu negligente	1
Artigu 23 no 138 (KP) - Tentativu omisídiu simples	1
Artigu 1787 Kódigu Sivil (KS) - Poder paternal	1
Totál	33

2. Totál desizaun ne'ebé JSMP monitoriza : 22

Tipu desizaun	Númeru
Suspensaun ba prizaun nia ezekusaun artigu 68 Kódigu Penál	7
Pena multa artigu 67 Kódigu Penál	7
Omologu	7
Suspensaun ba prizaun nia ezekusaun artigu 68 ho regra ba konduta artigu 70 letra (g) Kódigu Penál	1
Totál	22

3. Total kazu sira ne'ebé adia tuir JSMP nia monitorizasaun : 7

Razaun adiamentu	Númeru
Lezada la marka prezensa iha tribunál	2
Arguidu la marka prezensa	3
Autor la marka prezensa	1
Lezada no testémuña la marka prezensa	1
Totál	7

4. Total kazu sira ne'ebé sei kontinua prosesu tuir JSMP nia monitorizasaun : 4

B. Deskripsaun sumáriu ba desizaun kazu sira

1. Krime ofensa ba integridade fizika simples ho natureza violénsia doméstika

Nu. Prosesu : 0123/14.BCBCV
Kompozisaun tribunál : Singular
Juis : Dr. Jose Goncalves
Ministériu Públiku : Dr. Alfonso Lopez
Defeza : Dr. Jonas H. da Costa (defensória pública)
Tipu desizaun : Pena multa US\$ 45.00

Iha 01 Abril 2016, Tribunál Distritál Baucau prezide leitura sentensa ba krime ofensa ba integridade fízika simples ho natureza violénsia doméstika ne`ebé envolve arguidu CF hasoru nia feen, iha Distritu Baucau.

Ministériu Públiku akuza katak iha 13 Novembru 2014, iha tuku 5 lokraik, arguidu simu telefone hosi nia-feen primeiru katak arguidu nia-feen segundu ne`ebé nu`udar lezada iha kazu ne`e, na`ok ema nia modo iha merkadu. Tanba ne`e lezada husu telefone iha arguidu atu konfirma ho arguidu nia-feen primeiru kona-ba informasaun ne`e. Maibé depois arguidu basa dala 1 iha lezada nia hasan parte loos no kauza lezada monu ba rai no lezada nia matan fukun kona semente, rezulta kanek no ran. Aktu ne`e rezulta lezada konsege halo tratamentu iha Õspital Referal Baucau.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples konjuga ho artigu 35 Lei Kontra Violénsia Doméstika.

Iha julgamentu, arguida konfesa faktus hotu iha akuzasaun, foin primeira-vez komete krime, arepende ona nia hahalok. Arguidu nu`udar seguransa iha kompañia Lorosae, ho salariu kada fulan US\$ 120.00, diak malu ona ho lezada.

Iha alegasaun finál, ministériu públiku haktuir katak, arguidu konfesa faktus hotu. Tanba ne`e husu ba tribunál atu fó pena ne`ebé adekuadu ba arguidu.

Enkuantu defeza haktuir katak arguidu konfesa faktus hotu-hotu, no haree mós sirkunstansia sira ne`ebé partense ba kazu ne`e, husu ba tribunal aplika pena ne`ebé adekuadu ba arguidu.

Depoisde avalia faktus provadu sira ne`ebé produs durante julgamentu, tribunál konklui prosesu ne`e no kondena arguidu ho pena multa US\$45.00 no sei selu 0.50 sentavus kada loron durante loron 90. Tribunál mós aplika pena alternativa loron 60 prizaun wainhira arguidu la kumpri pena multa ne`e.

2. Krime ofensa ba integridade fízika simples

Nú. Prosesu	: 0129/14. PDBAU
Kompozisaun tribunál	: Singulár
Juis	: Dr. Jose Quintão
Ministériu Públiku	: Dr. Domingos Barreto
Defeza	: Dr. Sidonio M. Sarmiento (defensória pública)
Tipu desizaun	: Omologu

Iha 7 Abril 2016, Tribunál Distritál Baucau prezide julgamentu tentativa konsiliaun ba krime ofensa ba integridade fízika simples ne`ebé envolve arguidu CF hasoru lezada MX, iha Distritu Viqueque.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples.

Iha prosesu tentativa konsiliaisaun ne'e, lezada husu dezisténsia ba keixa no deklara katak perdua ona arguidu. Mezmu nune'e, lezada husu ba arguidu atu promete iha tribunál nia oin atu muda arguidu nia hahalok iha futuru. Nune'e, perante tribunál, arguidu husu deskulpa ba lezada no promete iha futuru sei muda ninia hahalok.

Relasiona ho pedidu ne'e, ministériu públiku no defeza apresia ho akordu ne'ebé parte rua deside ona no husu ba tribunál atu omologu akordu ne'e.

Bazeia ba akordu ne'e no pedidu dezisténsia keixa ne'e, tribunál omologu prosesu ne'e.

3. Krime ofensa ba integridade física simples no ameasa

Nú. Prosesu	: 0015/15.BCQLC
Kompozisaun tribunál	: Singulár
Juis	: Dr. Jose Quintao
Ministériu Públiku	: Dr. Domingos Barreto
Defeza	: Dr. Alexandrina de Sousa (advogada privada)
Tipu desizaun	: Pena prizaun fulan 9 suspende ba tinan 1

Iha 10 Abril 2016, Tribunál Distritál Baucau prezide leitura sentensa ba krime ofensa ba integridade física simples ne'ebé envolve arguidu MS hasoru lezada ZFES no lezadu SS, iha Distritu Baucau.

Ministériu Públiku akuza katak 14 Juñu 2014 tuku 16:00 lokraik, arguidu kaer tali belanda maran baku iha SS nia kelen to'o lezadu mi-an. Tanba ne'e, ZFES ne'ebé nu'udar SS nian hakilar hosi to'os laran ba arguidu katak tanba-sá arguidu baku nia oan. Arguidu hatan ba ZFES katak, "*nonok, orsida hau tuku o-nia kabun to'o mi-an iha o nia lipa laran.*" Depoisde koalia hanesan ne'e ba ZFES, arguidu hakbesik ba lezada hodi tuku dala 1 iha lezada nia reen-toos, no dehan ba lezada katak sorte lezada isin-rua, se lae arguidu tebe lezada nia kabun to'o lezada nia te-oan sira sai hotu.

Iha 17 Juñu 2015, iha to'os laran arguidu ameasa lezada dehan "*aban bain rua hau sei oho tiha o!*" Tanba ne'e halo lezada tauk ba hato'o keixa iha Polisia Eskuadra Quilikai.

Tuir-mai, iha 17 Setembru 2015 tuku 18: 00 lokraik, iha terminal Vila Nova Baucau arguidu tolok lezada no kontinua ameasa lezada katak "*aban bain-rua o ba fali Quilikai ha'u sei sunu o-nia uma no wainhira o ba to'os ha'u sei oho tiha o!*" Lezada sente tauk no hato'o tan keixa diretamente ba iha Polisia Eskuadra Baucau.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade física simples konjuga ho artigu 157 Kódigu Penál kona-ba ameasa.

Iha julgamentu, arguidu deklara katak baku dala 1 ho tali belanda ba lezadu SS nia kelen, maibé arguidu nega katak nia la tuku no la ameasa lezada. Arguidu foin primeira-ves komete krime. Depoisde tribunál konfirma ho lezada no lezadu kontinua reforsa faktu sira iha akuzasaun.

Testemuña DSS deklara katak wainhira testemuña atu ba to'os no liu-hosi lezada nia uma sorin, rona arguidu ho lezada istoriu malu hela kona-ba arguidu baku lezada ninia-oan.

Testemuña AdC (arguidu nia-feen) depoimenta katak akontesementu iha 14 Juñu 2015, 17 Juñu 2015 no 17 Setembru 2015, testemuña la hatene tanba testemuña la iha oin.

Testemuña seluk ho inisial TTG depoimenta katak iha 17 Setembru 2015 lokraik, iha testemuña nia uma terminal Vila Nova Baucau, testemuña rona arguidu tolok lezada no dehan ba lezada katak “ *aban bain rua o ba fali Quilikai ha’u sei sunu o nia uma, wainhira o ba to’os ha’u sei oho o!*”

Iha alegasaun finál, ministériu públiku konsidera katak, arguidu komete duni ofensa hasoru lezadu, no ameasa duni lezada iha Quilikai no terminal Vila Nova Baucau. Tanba ne’e husu ba tribunál fo pena ne’ebé prevene arguidu nia hahalok iha futuro.

Enkuantu defeza refere fali ba arguidu nia-deklarasaun antes katak arguidu so baku deit lezadu ho tali belanda, no la tuku no la ameasa lezada. Aleinde ne’e arguidu foin primeira-ves komete krime no arepende ona nia hahalok. Tanba ne’e husu ba tribunál absolve arguidu hosi krime ne’e.

Depoisde avalia faktus provadus sira ne’ebé produs durante julgamentu, no sirkunstánsia atenuante iha krime ne’e, tribunál konklui prosesu ne’e no kondena arguidu ba kada krime fulan 6 no pena unika fulan 9 prizaun suspende ba tinan 1.

4. Krime ofensa ba integridade fízika simples

Nu. Prosesu	: 0915/14.PDBAU
Kompozisaun tribunál	: Singulár
Juis	: Dr. Jose Goncalves
Ministériu Públiku	: Dr. Domingos Barreto
Defeza	: Dr. Antonio Fernandes (defensória pública)
Tipu desizaun	: Pena multa US\$ 30.00 ba arguidu AG no omologu arguidu SF

Iha 11 Abril 2016, Tribunál Distritál Baucau prezide leitura sentensa ba krime ofensa ba integridade fízika simples ne’ebé envolve arguidu AG no SF hasoru lezadu AF, iha Distritu Baucau.

Iha prosesu tentativa konsiliaun ne’e lezadu konkorda atu deziste nia keixa hasoru arguidu SF tanba iha relasaun familia no deklara katak prontu perdua arguidu. Iha parte seluk arguidu mós promete ba lezadu sei la repete tan nia hahalok ne’e hasoru lezadu iha futuro. Iha tempu hanesan arguidu mós husu deskulpa ba lezadu.

Bazeia ba pedidu dezisténsia keixa ne’e, tribunál omologu prosesu ne’e. Enkuantu arguidu AG lakohi dame-malu ho lezadu tanba ne’e tribunál kontinua ba prosesu julgamentu.

Ministériu Públiku akuza katak iha 5 Dezembru 2014, iha Suku Wailili, arguidu AG, lori sumbriña nia besi baku dala 6 iha lezadu nia-ulun no dala 4 iha lezadu nia kotuk laran.

Arguidu komete aktu ne`e, tanba lezadu duun arguidu buan. Lezadu konsege halo tratamentu iha Õspital Referál Baucau.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples.

Iha julgamentu, arguidu AG konfesa faktus hotu iha akuzasaun no deklara katak momentu ne`e arguidu ho intensaun hafahe lezadu tanba baku malu ho nia maun alin sira. Tanba ne`e arguidu hodi sumbriña baku ba sira hotu la`os baku deit ba lezadu. Arguidu deklara katak foin primeira-vez komete krime no arepende ona nia hahalok. Depoisde tribunál konfirma ho lezadu kontinua reforsa faktu sira iha akuzasaun.

Testemuña AF depoimentu katak iha akontesementu ne`e, testemuña haree lezadu ho nia maun alin sira baku malu, tanba ne`e mak arguidu sori netik hodi baku dala barak iha lezadu nia isin.

Iha alegasaun finál, ministériu públiku haktuir katak arguidu konfesa faktus hotu iha akuzasaun, reforsa liután hosi lezadu no testemuña. Tanba ne`e husu ba tribunál aplika pena ne`ebé adekua ba arguidu.

Enkuantu defeza haktuir katak arguidu konfesa faktus hotu iha akuzasaun foin primeira-ves komete krime, arepende ona nia hahalok. Tanba ne`e husu ba tribunál aplika pena ne`ebé adekua ba arguidu.

Depoisde avalia faktus provadus sira ne`ebé produs durante julgamentu no sirkunstánsia atenuante iha krime ne`e, tribunál konklui prosesu ne`e no kondena arguidu ho pena multa US\$30.00 no sei selu 0.50 sentavus kada loron durante loron 60. Tribunál mós fiksa pena alternativa loron 40 iha prizaun, wainhira arguidu la kumpri pena multa ne`e.

5. Krime ofensa ba integridade fízika simples ho natureza violénsia doméstika

Nu. Prosesu : 0011/15.MNNTB
Kompozisaun tribunál : Singular
Juis : Dr. Jose Quintao
Ministériu Públiku : Dr. Luis H Rangel da Costa
Defeza : Dr. Jonas H. da Costa (defensoria pública)
Tipu desizaun : Pena prizaun fulan 3 suspende ba tinan 1

Iha 12 Abril 2016, Tribunál Distritál Baucau prezide leitura sentensa ba krime ofensa ba integridade fízika simples ho natureza violénsia doméstika ne`ebé envolve arguidu JO hasoru nia feen, iha Distritu Manatuto.

Ministériu Públiku akuza katak iha 23 Agostu 2015, tuku 18:00 lokraik, arguidu lori ai-sanak baku dala 1 iha lezada nia kotuk laran, dala 1 iha reen-toos ho ai-tutun no kona iha lezada nia matan okos parte karuk no rezulta kanek no ran. Aktu ne`e rezulta lezada tenke ba halo tratamentu iha Centru Saúde Natarbora. Kazu ne`e akontese tanba arguidu ho

lezada diskute malu wainhira aguidu fila hosi halo rate, husu ba lezada kona-ba sira nia-oan fetu ne`ebé seidaok tama uma.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples konjuga ho artigu 35 Lei Kontra Violénsia Doméstika.

Iha julgamentu, arguidu konfesa faktus hotu iha akuzasaun, foin primeira-vez komete krime, arepende ona nia hahalok, diak malu ona ho lezada. Tanba ne`e tribunál la presija rona tan lezada no kontinua ba alegasaun.

Iha alegasaun finál, ministériu públiku konsidera katak, arguidu konfesa faktus hotu, tanba ne`e husu ba tribunál aplika pena prizaun fulan 3 suspende ba tinan 1.

Enkuantu defeza husu ba tribunál aplika pena ne`ebé adekuaudu ba arguidu tanba arguidu konfesa faktus, foin primeira-vez komete krime, diak malu ona ho lezada.

Depoizde avalia faktus provadu sira ne`ebé produz durante julgamentu, tribunál konklui prosesu ne`e no kondena arguidu ho pena prizaun fulan 3 suspende ba tinan 1.

6. Krime ofensa ba integridade fízika simples

Nú. Prosesu	: 0026/15. MNLCL
Kompozisaun Tribunál	: Singulár
Juís	: Dra. Ercilia de Jesus
Ministériu Públiku	: Dr. Luis H Rangel da Cruz
Defeza	: Dr. Jonas H da Costa
Tipu desizaun	: Omologu

Iha 12 Abril 2016, Tribunál Distritál Baucau prezide julgamentu tentativa konsiliaun ba krime ofensa ba integridade fízika simples ne`ebé envolve arguidu NdC hasoru lezada IdC, iha Distritu Manatuto.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples.

Iha prosesu tentativa konsiliaun ne`e, lezada husu ba tribunál atu dada fali nia keixa hasoru arguidu, tanba sira resolve ona kazu ne`e tuir kustume Timor-nian.

Relasiona ho pedidu ne`e, ministériu públiku no defeza apresia ho akordu ne`ebé parte rua deside ona no husu ba tribunál atu omologu akordu ne`e.

Bazeia pedidu dezistensia hosi lezada no akordu ne`ebé parte sira hetan ona, tribunál konklui prosesu ne`e no omologu kazu ne`e.

7. Krime ofensa ba integridade fízika simples ho natureza violénsia doméstika

Nú. Prosesu	: 0008/16. BCBCV
-------------	------------------

Kompozisaun tribunál : Singulár
Juis : Dr. Jose Escurial
Ministériu Públiku : Dr. Luis H Rangel da Cruz
Defeza : Dr. Sidonio M Sarmiento (defensória pública)
Tipu desizaun : Pena prizaun fulan 6 suspende ba tinan 1

Iha 13 Abril 2016, Tribunál Distritál Baucau prezide leitura sentensa ba krime ofensa ba integridade física simples ho natureza violénsia doméstika ne'ebé envolve arguidu LFP hasoru nia feen, iha Distritu Baucau.

Ministériu Públiku akuza katak iha 11 Janeiru 2016 tuku 11:00 meudia, lezada sai hosi servisu seidak troka, derepenti arguidu sai hosi haris fatin lori bee rega ba lezada. Tanba ne'e lezada lori fatuk tuda halimar arguidu, maibe depois arguidu hakbesik ba lezada hodi tuku dala 1 iha lezada nia reen-toos. Aleinde ne'e arguidu mós kaer lezada riba ba rai no tu'ur iha lezada nia leten no buti lezada nia kakorok. Arguidu foti katana atu taa lezada, maibé sira nia oan hadau tiha katana. Tanba agresau hirak ne'e kauza lezada ba halo tratamentu iha Ôspital Referral Baucau.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade física simples konjuga ho artigu 35 Lei Kontra Violénsia Doméstika.

Iha julgamentu, arguidu konfesa faktus hotu iha akuzasaun, diak malu ona ho lezada, promete sei la komete tan aktu hanesan hasoru lezada iha futuru. Arguidu mós deklarata katak nia arepende ona nia hahalok, no deklarata katak foin primeira-vez komete krime. Wainhira tribunál konfirma fali ho lezada kona-ba faktu hirak ne'e no lezada kontinua maintein faktu sira iha akuzasaun.

Iha alegasaun finál, ministériu públiku haktuir katak arguidu konfesa faktus hotu iha akuzasaun no konfirma mós hosi lezada. Tanba ne'e husu ba tribunál kondena arguidu ho pena prizaun fulan 3 suspende ba tinan 1.

Enkuantu defeza husu ba tribunál atu aplika pena ne'ebé adekua ba arguidu, tanba arguidu konfesa, arepende ona nia hahalok no foin primeira-vez komete krime.

Depoide avalia faktus provadu sira ne'ebé produs durante julgamentu, tribunál konklui prosesu ne'e no kondena arguidu ho pena prizaun fulan 6 no suspende ba tinan 1.

8. Krime ofensa ba integridade física simples

Nú. Prosesu : 0855/15 PDBAU
Kompozisaun tribunál : Singulár
Juis : Dr. Jose Escurial
Ministériu Públiku : Dr. Luis H Rangel da Cruz
Defeza : Dr. Sidonio M. Sarmiento (defensória pública)
Tipu desizaun : Omologu

Iha 13 Abril 2016, Tribunál Distritál Baucau prezide julgamentu tentativa konsiliaun ba krime ofensa ba integridade fizika simples ne'ebé envolve arguidu MdC hasoru lezadu JdC, iha Distritu Viqueque.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fizika simples.

Iha prosesu tentativa konsiliaun ne'e, lezadu husu dezisténsia ba keixa ne'ebé nia apresenta hasoru arguidu tanba antes ne'e sira consege resolve ona kazu ne'e tuir kustume Timor nian.

Relasiona ho pedidu ne'e, ministériu públiku no defeza apresia ho akordu ne'ebé parte rua decide ona no husu ba tribunál atu omologu akordu ne'e.

Bazeia ba pedidu dezisténsia hosi lezadu no apresiasaun hosi ministériu públiku no defeza, tribunál konklui prosesu ne'e omologu akordu hosi parte sira.

9. Krime ofensa ba integridade fizika simples ho natureza violénsia doméstika

Nú. Prosesu	: 0006/16.PDBAU
Kompozisaun tribunál	: Singulár
Juis	: Dr. Jose Escurial
Ministériu Públiku	: Dr. Alfonso Lopez
Defeza	: Dr. Jose M Guterres (defensória pública)
Tipu desizaun	: Pena multa US\$ 120.00

Iha 13 Abril 2016, Tribunál Distritál Baucau prezide leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu JFAP hasoru nia feen, iha Distritu Baucau.

Ministériu Públiku akuza katak iha 12 Janeiro 2016, iha tuku 05:00 dader, arguidu ho lezada diskute malu, tanba lezada iha relasaun *amante (selingkuh)* ho arguidu nia alin rasik. Arguidu la hatene kona-ba relasaun ne'e, arguidu deskobre tanba lee mensagem hosi nia-alin iha lezada nia telefone. Arguidu tuku dala 1 iha lezada nia reen- toos, dala 1 kotuk laran, tuku dala 1 iha liman, basa dala 2 iha hasan sorin loos no tebe dala 1 iha lezada nia kelen loos. Lezada consege halo tratamentu iha iha Ōspital Referral Baucau.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fizika simples konjuga ho artigu 35 Lei Kontra Violénsia Doméstika.

Iha julgamentu, arguidu konfesa faktus hotu iha akuzasaun no deklarata katak depoisde akontesementu liu tiha lora ida sira rezolve keda problema ne'e. Arguidu mós deklarata katak arepende ona ninia hahalok. Arguidu nu'udar tradutor ho vensimentu fulan ida US\$ 200.00. Wainhira tribunál konfirma fali kona-ba faktu hirak ne'e no lezada kontinua reforsa katak faktus sira iha akuzasaun ne'e loos hotu.

Iha alegasaun finál, ministériu públiku haktuir katak iha produsaun ba provas, arguidu konfesa faktus hotu iha akuzasaun. Tanba ne'e husu ba tribunál aplika pena multa ba arguidu.

Enkuantu defeza husu ba tribunál atu aplika pena multa ne'ebe kmaan ba arguidu tanba arguidu konfesa faktus hotu no diak malu ona ho lezada.

Depoisde avalia faktus provadus sira ne'ebé produz durante julgamentu, tribunál konklui prosesu ne'e no kondena arguidu ho pena multa US\$ 120.00 ne'ebé sei selu US\$ 1.00 kada loron durante loron 120. Tribunál mós fiksa pena alternativa loron 80 iha prizaun, wainhira arguidu la kumpri pena multa ne'e.

10. Krime ofensa ba integridade fizika simples ho natureza violénsia doméstika

Nu. Prosesu : 0026/15.BCSIC
Kompozisaun tribunál : Singular
Juis : Dr. Ercilia de Jesus
Ministériu Públiku : Dr. Domingos Barreto
Defeza : Dr. Juvinal Yanes (defensória pública)
Tipu desizaun : Pena prizaun fulan 3 suspende ba tinan 1

Iha 14 Abril 2016, Tribunál Distritál Baucau prezide leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu AdC hasoru nia feen, iha Distritu Baucau.

Ministériu Públiku akuza katak Iha 4 Jullu 2015, iha tuku 06:00 dadersan, arguidu foti tudik kiik ida sona iha lezada nia-sorin loos no rezulta kanek ki'ik-oan no ran sai no lezada tenke ba halo tratamentu iha óspital. Arguidu komete krime ne'e tanba diskute malu ho lezada wainhira lezada husu ba arguidu atu buka servisu hodi nune'e bele hetan osan atu sustenta sira nia uma laran.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fizika simples konjuga ho artigu 35 Lei Kontra Violénsia Doméstika.

Iha julgamentu, arguidu konfesa faktus hotu iha akuzasaun, arguidu la iha antisidente kriminais, arepende ona nia hahalok, diak malu ona ho lezada. Aleinde ne'e, wainhira tribunál konfirma fali ho lezada relasiona ho faktu hirak ne'e, no lezada kontinua konfirma faktu sira iha akuzasaun.

Iha alegasaun finál, ministériu públiku haktuir katak arguida konfesa faktus hotu iha akuzasaun, tanba ne'e husu ba tribunál aplika pena prizaun fulan 3 suspende ba tinan 1.

Enkuantu defeza husu ba tribunál aplika pena ne'ebé adekua ba arguidu tanba arguidu konfesa faktus, foin primeira-vez komete krime no diak malu ona ho lezada.

Depoisde avalia faktus provadu sira ne'ebé produz durante julgamentu, tribunál konklui prosesu ne'e no kondena arguidu ho pena prizaun fulan 3 suspende ba tinan 1.

11. Krime ofensa integridade fizika simples ho natureza violénsia doméstika

Nu. Prosesu : 0214/13.PDBAU
Kompozisaun tribunál : Singulár
Juis : Dr. Jose Goncalves
Ministériu Públiku : Dr. Alfonso Lopez
Defeza : Dr. Jose M Guterres (defensória pública)
Tipu desizaun : Pena multa US\$ 45.00

Iha 15 Abril 2016, Tribunál Distritál Baucau prezide leitura sentensa ba krime ofensa ba integridade física simples ho natureza violénsia doméstika ne'ebé envolve arguidu AB hasoru nia feen, iha Distritu Baucau.

Ministériu Públiku akuza katak iha 28 Maiu 2013, iha tuku 12:15 meudia, arguidu ho lezada diskute malu, tanba lezada foti arguidu nia osan 0.50 sentavus hodi sosa modo sein arguidu nia-koñesementu. Arguidu tuku dala 1 iha lezada nia kabas loos, tebe dala 2 iha lezada nia-kidan no tuku dala 1 iha lezada nia tilun-hun. Aktu ne'e rezulta lezada sofre kanek no ran no suku pontu 2 iha lezada nia tilun, iha Centru Saúde Laga.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade física simples konjuga ho artigu 35 Lei Kontra Violénsia Doméstika.

Iha julgamentu, arguidu deklara parsialmente ba faktus sira iha akuzasaun, katak faktu ne'ebé loos mak arguidu tuku dala 1 iha lezada nia tilun-hun. Arguidu arepende ona nia hahalok no foin primeira-vez komete krime. Wainhira tribunál konfirma ho lezada no lezada kontinua reforsa faktu sira iha akuzasaun.

Iha alegasaun finál, ministériu públiku haktuir katak arguidu konfesa parsial, tanba ne'e husu ba tribunál aplika pena ne'ebe adekuaudu ba arguidu.

Enkuantu defeza husu ba tribunál aplika pena ne'ebé adekuaudu ba arguidu tanba konsidera katak, arguidu rekoñese parsial ba faktus balun, mesmuke lezada kontinua mantein faktu sira ne'e. Aleinde ne'e arguidu foin primeira-vez komete krime no arepende ona nia hahalok.

Depoide avalia faktus provadus sira ne'ebé produs durante julgamentu, tribunál konklui prosesu ne'e no kondena arguidu ho pena multa US\$45.00, ne'ebé sei selu 0.50 sentavus kada loron durante loron 90, no selu mós kustu judisial US\$10.00. Tribunál mós fiksa pena alternativa loron 60 iha prizaun, wainhira arguidu la kumpri pena multa ne'e.

12. Krime ofensa ba integridade física simples ho natureza violénsia doméstika

Nú. Prosesu : 0029/15.MNMNT
Kompozisaun tribunál : Singulár
Juis : Dr. Jose Quintao
Ministériu Públiku : Dr. Domingos Bareto
Defeza : Dr. Jose M Guterres (defensória pública)
Tipu desizaun : Pena multa US\$15.00

Iha 19 Abril 2016, Tribunál Distritál Baucau prezide leitura sentensa ba krime ofensa ba integridade fízika simples ho natureza violénsia doméstika ne`ebé envolve arguidu AdS hasoru nia feen, iha Distritu Manatuto.

Ministériu Públiku akuza katak iha 15 Jullu 2015 tuku 07:00 dadersan, arguidu lori ai-sukaer sanak baku dala 7 iha lezada nia kotuk laran too ai-sanak tohar. Arguidu tuku dala 2 iha lezada nia kabas parte loos no karuk no rezulta lezada tenke ba halo tratamentu iha Centru Saude Laklo. Kazu ne'e akontese wainhira arguidu bolu lezada hosi uma laran, maibé lezada la hatan tanba lezada sei fase hela bikan iha dapur no liu-tiha minutu balun lezada foin hatan.

Ministériu Públiku akuza arguida kontra artigu 145 Kódigu Penál kona-ba krime ofensa ba integridade fízika simples konjuga ho artigu 35 Lei Kontra Violénsia Doméstika.

Iha julgamentu, arguidu konfesa faktus hotu tuir akuzasaun. Arguidu deklara katak depoisde akontesementu, iha semana ida sira diak malu fali. Arguidu arepende ona nia hahalok, foin primeira-vez komete krime, arguidu hakiak animal fulan 1 bele hetan osan US\$ 50.00.

Depoisde tribunál konfirma ho lezada kontinua reforsa faktu sira iha akuzasaun, lezada deklara katak, depoisde akontesementu ne`e too agora arguidu la baku tan lezada.

Iha alegasaun finál, ministériu públiku haktuir katak arguida konfesa faktus hotu hosi akuzasaun, no konfirma mós hosi lezada. Tanba ne'e husu ba tribunál atu aplika pena tuir artigu 145 Kódigu Penál.

Enkuantu defeza haktuir katak arguidu konfesa faktus hotu hosi akuzasaun, foin primeira-vez komete krime no arepende ona nia hahalok. Tanba ne`e husu ba tribunál aplika pena ne`ebé adekua ba arguidu.

Depoisde avalia faktus provadus sira ne`ebé produz durante julgamentu, tribunál konklui prosesu ne`e no kondena arguidu ho pena multa US\$15.00 no sei selu 0.50 sentavus kada laron durante laron 30. Tribunál mós fiksa pena alternativa laron 20 prizaun, wainhira arguidu la kumpri pena multa ne`e.

13. Krime ofensa ba integridade fízika simples ho natureza violénsia doméstika

Nú. Prosesu	: 0060/15.MNMNT
Kompozisaun Tribunál	: Singulár
Juis	: Dr. Jose Quintao
Ministériu Públiku	: Dr. Domingos Bareto
Defeza	: Dr. Juvinal Yanes
Tipu desizaun	: Pena multa US\$ 30.00

Iha 19 Abril 2016, Tribunál Distritál Baucau prezide leitura sentensa ba krime ofensa ba integridade fízika simples ho natureza violénsia doméstika ne`ebé envolve arguidu FMS hasoru nia feen, iha Distritu Manatuto.

Ministériu Públiku akuza katak iha 22 Novembru 2015 tuku 06:00 dadersan, arguidu tuku dala 1 iha lezada nia kabas no lezada tenta atu halai, arguidu foti ai-sar baku dala 1 iha lezada nia liman kabun, no kauza lezada ba tratamentu iha óspital. Kazu ne'e akontese kuandu arguidu husu ba lezada atu halo relasaun seksuál maibé lezada hatan katak nia kolen hela.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples konjuga ho artigu 35 Lei Kontra Violénsia Doméstika.

Iha julgamentu, arguidu konfesa faktus hotu iha akuzasaun, no deklara katak nia komete duni krime refere hasoru lezada. Maibe arguidu deklara katak depoisde akontesementu ne'e, liu tiha lora ida sira diak malu fali. Arguidu arepende ona nia hahalok, arguidu foin primeira-vez komete krime. Wainhira tribunál konfirma fali kona-ba faktu sira ne'e ho lezada no lezada kontinua mantein faktu sira iha akuzasaun.

Iha alegasaun finál, ministériu públiku haktuir katak arguidu konfesa faktus hotu iha akuzasaun, tanba ne'e husu ba tribunál kondena arguidu ho pena multa.

Enkuantu defeza husu ba tribunál atu aplika pena admoestasaun ba arguidu, tanba arguidu konfesa, arepende ona nia hahalok no foin primeira-vez komete krime.

Depoisde avalia faktus provadus sira ne'ebé produz durante julgamentu, tribunál konklui prosesu ne'e no kondena arguidu ho pena multa US\$ 30.00 kada lora sei selu 0.50 sentavus. Tribunál fiksa mós pena alternativa lora 40 prizaun, wainhira arguidu la kumpri pena multa ne'e.

14. Krime ofensa integridade fízika simples ho natureza violénsia doméstika

Nú. Prosesu : 0006/14.BCPVN
Kompozisaun tribunál : Singulár
Juis : Dr. Antonio Fonseca
Ministériu Públiku : Dr. Domingos G Barreto
Defeza : Dr. Juvinal Yanes (defensória pública)
Tipu desizaun : Pena prizaun fulan 8 suspende ba tinan 1, apresentaan
periódiku iha tribunál kada fulan dala 1 durante fulan 8.

Iha 19 Abril 2016, Tribunál Distritál Baucau prezide leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu JS hasoru nia feen, iha Distritu Viqueque.

Ministériu Públiku akuza katak iha 12 Jullu 2015, iha tuku 19:00 kalan, arguidu ho lezada diskute malu, tanba durante lora tomak lezada la tein ba labarik sira han. Arguidu tolok lezada no tuku dala 2 iha lezada nia tilun sorin-karuk no loos, tuku dala 1 iha matan karuk, dala 1 tan iha lezada nia kotuk laran no tebe iha kotuk laran. Aktu ne'e rezulta lezada tenke halo tratamentu iha óspital.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples konjuga ho artigu 35 letra (b) Lei Kontra Violénsia Doméstika.

Iha julgamentu, arguidu konfesa faktus hotu-hotu iha akuzasaun no promete katak sei la komete tan aktu hanesan hasoru lezada iha futuru. Arguidu mós deklara katak nia diak malu ona ho lezada, arepende ona nia hahalok, no foin primera-vez komete krime. Aleinde ne'e, lezada mós kontinua konfirma faktus sira iha akuzasaun.

Iha alegasaun final, ministériu públiku husu ba tribunál aplika pena prizaun fulan 6 suspende ba tinan 1 tanba konsidera katak arguidu konfesa integralmente ba faktus hotu-hotu iha akuzasaun, no reforsa liutan hosi lezada.

Enkuantu defeza husu ba tribunal aplika pena ne'ebé adekua ba arguidu tanba arguidu konfesa faktus hotu iha akuzasaun, diak malu ona ho lezada no foin primeira-vez komete krime, arepende nia hahalok.

Depoide avalia faktu provadu sira ne'ebé produz durante julgamentu, tribunál konklui prosesu no kondena arguidu ho pena prizaun fulan 8 suspende ba tinan 1, no apresentaan periódiku fulan 1 dala 1 iha tribunál durante fulan 8.

15. Krime ofensa ba integridade física simples ho natureza violência doméstica

Nú. Prosesu	: 0069/15.PDBAU
Kompozisaun tribunál	: Singulár
Juis	: Dr. Jose Quintao
Ministériu Públiku	: Dr. Alfonso Lopez
Defeza	: Dr. Grigorio de Lima (defensória pública)
Tipu desizaun	: Pena multa US\$30.00

Iha 20 Abril 2016, Tribunál Distritál Baucau prezide leitura sentensa ba krime ofensa ba integridade física simples ho natureza violência doméstica ne'ebé envolve arguidu PS hasoru nia feen, iha Distritu Manatuto.

Ministériu Públiku akuza katak iha 18 Jullu 2015, tuku 21:30 kalan, arguidu fanu lezada atu kumu arguidu nia isin tanba arguidu moras. Maibé lezada la hader, arguidu kontinua fanu no foti ka bok lezada nia ulun tun-sae, maibé lezada nafatin la hader. Arguidu tuku dala 1 iha lezada nia ulun no dala 1 iha lezada nia matan laran. Aktu ne'e rezulta lezada nia matan mean no metan no lezada tenke ba halo tratamentu iha Centru Saúde Laklubar.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade física simples konjuga ho artigu 35 Lei Kontra Violência Doméstica.

Iha julgamentu, arguidu konfesa faktus hotu iha akuzasaun. Arguidu mós deklara katak depoide akontesementu liu tiha semana ida diak malu kedas ho lezada, arepende ona nia hahalok, foin primeira-vez komete krime. Arguidu servisu nu'udar motorista salariu kada fulan US\$150.00.

Aleinde ne'e, lezada kontinua reforsa faktus hotu-hotu iha akuzasaun. Tanba arguidu konfesa faktus no reforsa mós hosi lezada, nune'e, tribunál presinde testemuña sira no kontinua ba alegasaun.

Iha alegasaun finál, ministériu públiku husu ba tribunál atu aplika pena multa ba arguidu tanba arguidu konfesa faktus hotu no reforsa liutan hosi lezada. Aleinde ne'e arguidu primeira-vez komete krime. Enkuantu defeza haktuir katak arguidu konfesa faktus hotu, foin primeira-vez komete krime no arepende ona nia hahalok. Tanba ne'e husu ba tribunál aplika pena ne'ebé adekua ba arguidu.

Depoisde avalia faktus provadu sira ne'ebé produs durante julgamentu, tribunál konklui prosesu ne'e no kondena arguidu ho pena multa US\$30.00 ne'ebé sei selu 0.50 sentavus kada lora durante lora 60. Tribunál fiksa mós pena alternativa lora 40 prizaun, wainhira arguidu la kumpri pena multa ne'e.

16. Krime danu simples

Nú. Prosesu : 2438/10 PDBAU
Kompozisaun tribunál : Singulár
Juis : Dr. Jose Escurial
Ministériu Públiku : Dr. Alfonso Lopez
Defeza : Dr. Jose M Guterres (defensória pública)
Tipu desizaun : Omologu

Iha 20 Abril 2016, Tribunál Distritál Baucau prezide julgamentu tentativa konsiliaun ba krime danu simples ne'ebé envolve arguidu MdC hasoru LR, iha Distritu Viqueque.

Ministériu Públiku akuza arguidu kontra artigu 258 Kódigu Penál kona-ba danu simples.

Iha prosesu tentativa konsiliaun ne'e, lezadu apresenta pedidu dezisténsia ba keixa hasoru arguidu tanba antes ne'e sira rezolve ona kazu ne'e tuir kustume Timor-nian.

Relasiona ho pedidu ne'e, ministériu públiku no defeza apresia ho akordu ne'ebé parte rua decide ona no husu ba tribunál atu omologu akordu ne'e.

Bazeia ba pedidu dezisténsia keixa hosi lezadu, no konsiderasaun ba apresisaun hosi ministériu públiku no defeza, tribunál konklui prosesu refere no omologu akordu ne'e.

17. Krime amesa no danu simples

Nú. Prosesu : 0014/15.VQOSU
Kompozisaun tribunál : Singulár
Juis : Dr. Jose Escurial
Ministériu Públiku : Dr. Domingos Bareto
Defeza : Dr. Jose M Guterres (defensória pública)
Tipu desizaun : Omologu

Iha 20 Abril 2016, Tribunál Distritál Baucau prezide julgamentu tentativa konsiliaun ba krime amesa no danu simples ne'ebé envolve arguidu JdSN hasoru lezadu CFS, iha Distritu Baucau.

Ministériu Públiku akuza arguidu kontra artigu 157 Kódigu Penál kona-ba ameasa konjuga ho artigu 258 Kódigu Penál kona-ba danu simples.

Iha prosesu tentativa konsiliaun ne'e, lezadu husu atu dezeste nia-keixa hasoru arguidu tanba lezadu perdua ona arguidu. Aleinde ne'e tanba arguidu mós hadia fali lezadu nia motor ho osan US\$ 60.00 no arguidu husu ona diskulpa ba lezadu perante iha tribunál.

Relasiona ho pedidu ne'e, ministériu públiku no defeza apresia ho akordu ne'ebé parte rua decide ona no husu ba tribunál atu omologu akordu ne'e.

Bazeia ba pedidu dezisténsia keixa hosi lezadu, no ho konsiderasaun ba apresisaun hosi pozisaun finál hosi ministériu públiku no defeza, tribunál omologu akordu ne'e.

18. Krime ofensa ba integridade fízika simples

Nú. Prosesu : 0067/15.MNMNT
Kompozisaun Tribunál : Singulár
Juís : Dr. Jose Quintao
Ministériu Públiku : Dr. Domingos Bareto
Defeza : Dr. Sidonio M Sarmiento (defensória Pública)
Tipu desizaun : Omologu

Iha 21 Abril 2016, Tribunál Distritál Baucau prezide julgamentu tentativa konsiliaun ba krime ofensa ba integridade fízika simples envolve arguidu BdC hasoru lezadu JdC, iha Distritu Manatuto.

Ministériu públiku akuza arguidu kontra artigu 145 Kódigu Penál kona-ba ofensa ba integridade fízika simples.

Iha prosesu tentativa konsiliaun ne'e, arguidu rekoñese nia-sala no sira consege rezolve ona kazu ne'e liu hosi kustume Timor-nian. Arguidu mós husu ona diskulpa ba lezadu iha julgamentu nia laran.

Aleinde ne'e, arguidu promete katak nia sei la repete tan aktu ne'e iha futuro. Iha parte seluk lezadu perdua ona arguidu no decide dada fila fali kazu ne'e.

Relasiona ho pedidu ne'e, ministériu públiku no defeza apresia ho akordu ne'ebé parte rua decide ona no husu ba tribunál atu omologu akordu ne'e.

Bazeia ba pedidu dezisténsia keixa hosi lezadu, no apresiasaun finál hosi ministériu públiku no defeza, tribunál konklui prosesu refere no omologu akordu ne'e.

19. Krime ofensa ba integridade fízika simples ho natureza violénsia doméstika

Nú. Prosesu : 0270/13. PDBAU
Kompozisaun tribunál : Singulár
Juis : Dr. Jose Goncalves

Ministériu Públiku : Dr. Domingos Barreto
Defeza : Dr. Grigorio de Lima (defensória Pública)
Tipu desizaun : Pena prizaun fulan 3 suspende ba tinan 1

Iha 25 Abril 2016, Tribunál Distritál Baucau prezide leitura sentensa ba krime ofensa ba integridade física simples ho natureza violénsia doméstika ne`ebé envolve arguidu FPS hasoru nia feen, iha Distritu Baucau.

Ministériu Públiku akuza katak iha 4 Juñu 2013 tuku 09:00, arguidu ho lezada diskute malu kona-ba modo atu han. Arguidu foti ai baku dala 1 iha lezada nia kotuk laran, dala 1 iha lezada nia ulun no basa dala 1 iha lezada nia hasan loos. Aktu ne`e kauza lezada ba halo tratamentu iha Centru Saude Baguia.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade física simples konjuga ho artigu 35 Lei Kontra Violénsia Doméstika.

Iha julgamentu, arguidu konfesa faktus hotu-hotu iha akuzasaun, dekkara katak diak malu ona ho lezada, arepende ona nia hahalok no foin primeira-vez komete krime. Wainhira tribunál konfirma ho lezada kona-ba faktu sira iha akuzasaun, no lezada kontinua mantein faktus sira ne`e.

Iha alegasaun finál, ministériu públiku haktuir katak arguidu konfesa faktus hotu-hotu iha akuzasaun, tanba ne`e husu ba tribunál aplika pena ne`ebé adekuaudu ba aguidu.

Aleinde ne`e, defeza haktuir katak arguidu konfesa faktus hotu-hotu, foin primeira-vez komete krime no arepende ona nia hahalok. Tanba ne`e husu ba tribunál aplika pena ne`ebé dekuadu ba arguidu.

Depoisde avalia faktus provadus sira ne`ebé produz durante julgamentu, tribunál konklui prosesu ne`e kondena arguidu ho pena prizaun fulan 3 suspende ba tinan 1.

20. Krime ofensa ba integridade física simples ho natureza violénsia doméstika

Nu.Prosesu : 0011/15. VQWTL
Kompozisaun tribunál : Singulár
Juis : Dr. Jose Quintao
Ministériu Públiku : Dr. Domingos G Bareto
Defeza : Dr. Juvinal Yanes (defensória pública)
Tipu desizaun : Pena prizaun fulan 6 suspende ba tinan 1

Iha 26 Abril 2016, Tribunál Distritál Baucau prezide leitura sentensa ba krime ofensa ba integridade física simples ho natureza violénsia doméstika ne`ebé envolve arguidu FdS hasoru nia feen, iha Distritu Baucau.

Ministériu Públiku akuza katak iha 14 Marsu 2015 tuku 13:00 meudia, arguidu ho lezada diskute malu, tanba arguidu la fo hatene ba lezada kona-ba arguidu nia maun nia aifunan. Lezada hirus no foti fatuk tuda iha arguidu nia liman loos, nune`e arguidu foti au-badak

baku dala 1 iha lezada nia nia liman loos, no rezulta lezada nia liman tohar, no tenke ba halo tratamentu iha óspital

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fizika simples konjuga ho artigu 2 no 35 Lei Kontra Violénsia Doméstika.

Iha julgamentu, arguidu konfesa faktus hotu-hotu iha akuzasaun no deklara katak depoisde akontesementu ne'e arguidu mak lori lezada ba kura lezada nia liman ho ai-moruk tradisional, iha sub-distritu Laleia, Distritu Manatuto. Arguidu deklara katak foin primeira-vez komete krime, arepende ona nia hahalok no diak malu ona ho lezada.

Wainhira tribunál konfirma ho lezada relasiona ho faktu hirak ne'e, lezada kontinua mantein faktu sira iha akuzasaun no konfirma katak nia liman tohar tanba konsekuensia hosi aktu ne'ebé arguidu komete. Lezada mós konfirma katak depoisde akontesementu lezada ba halo tratamentu iha óspital no arguidu kontinua lori lezada ba kura ho ai moruk tradisional iha Laleia Distritu Manatuto.

Iha alegasaun finál, ministériu públiku haktuir katak arguidu konfesa faktus hotu, no reforsa liutan mós hosi lezada, tanba ne'e husu ba tribunál fo pena prizaun tinan 1 suspende ba tinan 1.

Enkuantu defeza haktuir katak arguidu konfesa faktus hotu-hotu iha akuzasaun, foin primeira-vez komete krime no diak malu ona ho lezada. Tanba ne'e husu ba tribunál aplika pena ne'ebé adekuaadu ba arguidu.

Depoisde avalia faktus provadu sira ne'ebé produz durante julgamentu, tribunál konklui prosesu ne'e no kondena arguidu ho pena prizaun fulan 6 suspende ba tinan 1.

21. Krime ofensa ba integridade fizika simples

Nú. Prosesu	: 0006/14.PDBAU
Kompozisaun tribunál	: Singulár
Juís	: Dra. Ercilia de Jesus
Ministériu Públiku	: Dr. Alfonso Lopez
Defeza	: Dr. Grigorio de Lima (defensória pública)
Tipu desizaun	: Omologu

Iha 27 Abril 2016, Tribunál Distritál Baucau prezide julgamentu tentativa konsiliausaun ba krime ofensa ba integridade fizika simples ne'ebé envolve arguidu MX hasoru lezadu PF, iha Distritu Lautem.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fizika simples.

Iha prosesu tentativa konsiliausaun ne'e, arguidu ne'ebe nu'udar lezadu nia banin-mane rekoñese nia-sala, no deklara katak, prontu fo sala tais 2 ba lezadu tuir kustume Timor-nian. no perante tribunál, arguidu husu ona diskulpa ba lezadu.

Aleinde ne'e, arguidu mós promete katak nia-sei la repete tan aktu ne'e iha futuru. Iha parte seluk lezadu fó perdua ba arguidu no decide dada fila fali kazu ne'e.

Relasiona ho pedidu ne'e, ministériu públiku no defeza apresia ho akordu ne'ebé parte rua decide ona no husu ba tribunál atu omologu akordu ne'e.

Bazeia ba prosesu hirak ne'e no pedidu dezisténsia keixa hosi lezadu, tribunál konklui prosesu ne'e omologu akordu ne'e.

22. Krime ofensa ba integridade fízika simples ho natureza violénsia doméstika

Nú. Prosesu : 0016/15.PDBAU
Kompozisaun tribunál : Singulár
Juis : Dra. Ercilia de Jesus
Ministériu Públiku : Dr. Alfonso Lopez
Defeza : Dr. Jose M Guterres (defensória pública)
Tipu desizaun : Pena prizaun fulan 6 suspende ba tinan 1

Iha 28 Abril 2016, Tribunál Distritál Baucau prezide leitura sentensa ba krime ofensa ba integridade fízika simples ne'ebé envolve arguidu AGdB hasoru nia feen, iha Distritu Manatuto.

Ministériu Públiku akuza katak iha Setembru 2014, tuku 10:00, arguidu kaer iha lezada nia fuuk dulas ba kotuk, tanba lezada ba asina karta separasaun entre arguidu ho ledaza iha sede suku. Aktu ne'e rezulta lezada sofre moras no tenke ba halo tratamentu iha Centru Saúde Laleia. Aleinde ne'e arguidu nia-inan ho aman hadau labarik iha lezada.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples konjuga ho artigu 2, 3 no 35 letra (b) Lei Kontra Violénsia Doméstika.

Iha julgamentu, arguidu rekoñese faktus hotu-hotu iha akuzasaun, foin primeira-vez komete krime, arepende ona nia hahalok, no deklara katak nia nafatin hakarak lezada maibé lezada mak lakohi ona. Depoisde tribunál konfirma ho lezada kontinua reforsa faktu sira iha akuzasaun.

Iha alegasaun finál, ministériu públiku haktuir katak arguidu konfesa faktus hotu iha akuzasaun, tanba ne'e husu ba tribunál kondena arguidu ho pena multa.

Enkuantu defeza haktuir katak arguidu konfesa faktus hotu iha akuzasaun, foin primeira-vez komete krime, tanba ne'e husu ba tribunál aplika pena multa ne'ebé kmaan ba arguidu.

Depoisde avaliaa faktus provadus sira ne'ebé produz durante julgamentu, tribunál konklui prosesu ne'e no kondena arguidu ho pena prizaun fulan 6 suspende ba tinan 1.

Atu hetan informasaun kompleitu, favor kontaktu:

Luis de Oliveira Sampaio
Diretór Ezekutivu JSMP
Email: luis@jsmp.minihub.org